

## 每週經課朗誦經文(巴克禮台語漢字)2013/03/17

### 共同經課 - 1 以賽亞書四十三章十六節~二十一節

16 耶和華佇大海中開路，佇大水中開路，17 互車、馬、兵丁、勇猛的人攏出來，in做一下倒落去，袂閣起來；in滅無，親像熄去的火。18 耶和華按呢講：恁毋通紀念前的事，亦毋通想早時的代誌。19 看啊，我欲做一項新的事；今啲發現，恁豈毋知嗎？我欲佇曠野開道路，佇沙漠開江河。20 山裡的走獸欲尊重我；山狗及駝鳥亦欲按呢。因為我互曠野有水，互沙漠有河，通互我的百姓、我所揀者飲。21 此個百姓是我為著家己所造的，欲報揚我的名聲。

### 共同經課 - 2 詩篇一百二十六篇

1 〔上崎仔的詩。〕耶和華導許個受掠的人倒轉來錫安，彼時咱親像眠夢。2 彼時咱的嘴哈哈笑、咱的舌出大歡喜的聲，外邦中就有人講：耶和華為in行大事！3 耶和華有為咱行大事，咱就歡喜。4 耶和華啊，求你互阮受掠的人倒轉，親像南方的溪水閣流。5 流目屎撒種子者，欲出歡喜的聲收割！6 彼個流目屎帶種子出去者，的確欲帶伊的稻把歡歡喜喜倒來！

### 共同經課 - 3 腓立比書三章四 b 節~十四節

4 若別人掠做有通倚靠肉體，我就閣卡有。5 我第八日受割禮；是以色列族的人、便雅憫的支派，是希伯來人所生的希伯來人。照律法，就是法利賽人；6 照熱心，就是窘逐教會；照佇律法的義，就是無縫通嫌。7 若是平素做我的利益的，我為著基督已經看伊做損害。8 毋若按呢，我真正看萬事做損害，因為我掠識我的主基督耶穌做第一好。我為著伊曾損失一切，也看做糞埤，是愛得著基督；9 來長長惦佇伊，毋是有家己的義出佇律法的，就是有對信基督的義，上帝為著信所賞賜的，10 互我識伊，及伊復活的權能，以及有份伊的受苦，來學伊的死，11 看會得通到佇彼個對死人中的復活。12 毋是講我已經得著，抑是已經完全；獨獨走進前，看會通得著基督耶穌的所以得著我的。13 兄弟啊，我無掠家己做已經得著，獨獨專務一項，就是袂記得後面的事，致意頭前的事，14 向所插的標來走，到得著上帝佇基督耶穌對頂面召咱的賞。

### 共同經課 - 4 約翰福音十二章一節~八節

1 所以耶穌佇搬(pōa<sup>n</sup>)過節前六日，到伯大尼，就是拉撒路所住的所在，伊是耶穌對死人中互伊復活的。2 in就佇遐為著耶穌備辦下昏頓；馬大啲伺候，拉撒路亦是同桌的一個。3 馬利亞就提一斤極貴氣真的哪嚙香油，抹耶穌的腳，閣用家己的頭毛拭伊的腳，香油的芳滿厝。4 有伊的學生一個，欲賣伊的，就是加略人猶大，5 講：「啥事毋將此個膏油賣銀仔三百個來互喪鄉人啊？」6 伊講按呢，毋是因為伊關心佇喪鄉人，是因為伊是賊，閣管錢袋，偷提所下的若定。7 耶穌就講：「出在伊！將此個留啲到我埋葬的日。8 因為常常有喪鄉人及恁佇啲，若是我無常常及恁佇啲。」